

Allannguutissatut siunnersuut

Tipsernermit lottornermillu iluanaarutininik agguaassisarneq pillugu Inatsisartut inatsisissaattut siunnersuut pillugu

Aappassaaneerneqarneranut atatillugu Naalakkersuisunit saqqummiunneqartoq.

1. § 4-mi immikkoortoq nutaaq ilanngunneqassaaq:

"Imm. 3. Imm.1-imi aalajangersagaq qanorluunniit ikkaluarpat Avalak tapiiffigineqarsinnaassaaq".

2. § 8-mi immikkoortoq nutaaq ilanngunneqassaaq:

"§ 2-mi imm.1, nr.1-3 naapertorlugu naalakkersuisut kattuffinnit taakkartorneqartunit tapiissutininik agguaassinermi aalajangersakkat pillugit maalaarutininik suliaqarnissamut atatillugu malittarisassiorsinnaassapput".

Oqaaseqaatit

Nr. 1-imit

Aalajangersakkap malitsigaa Avalaap(siornatigut DKIK) tipsernermi lottornermillu iluanaarutininik tapiiffigineqarsinnaalernera, apeqqutaatinnagu peqatigiiffiup Danmarkimi angerlarsimaffeqarnera.

Siunnersuummut tunuliaqutaavoq Inatsisartut Kultureqarnermut Ilinniartitaanermullu ataatsimiititaliaata tipsernermit lottornermillu iluanaarutininik agguaassisarneq pillugu Inatsisartut inatsisissaattut siunnersuutaata aappassaaneerneqarnissaanut atatillugu isumaliutissiissutaa, tassani ilaatigut saqqummermat ataatsimiititaliamit isumagineqartoq Avalak DUF-imit tapiissutisinnangippat siunnersuut allannguuteqartinneqassasoq, taamalu qulakkeerneqassaluni Avalaap Kalaallit Nunaanni tipsernermit lottornermillu iluanaarutininik agguaassassinik qinnuteqarsinnaangornissaa.

Nr. 2-mut

Taamatut aalajangersaanikkut Naalakkersuisut pisinnaatitaaffigilerneqarput § 2-mi imm.1, nr. 1-3 naapertorlugu kattuffinnit taakkartorneqartunit tapiissutinik agguaassinermi aalajangersakkat pillugit maalaarutinik suliaqarnissamut atatillugu malittarisassiornissamut.

Tassunga ilanngullugu naalakkersuisut malittarisassiornermi aalajangersarsinnaavaat maalaarutitut suliaassat ataatsimiititamiit suliarineqarsinnaanerit, assersuutigalugu kattuffiit sinniissaannik pingasunik Namminersornerullutillu Oqartussat sinniissaannik ataatsimik inuttaqartinneqartumik. Taamatuttaaq malittarisassiornikkut aalajangersarneqarsinnaassaaq allattoqarfimmit kiffartuunneqarnissamut tunngasut assigisaallu, maalaarutitut suliaassat ataatsimiititamiit suliarineqarnissaanut tunngasut pingaaruteqartut pillugit.

Taamatut malittarisassanik aalajangersaanissaq sioqqullugu kattuffiit pineqartut pingasut oqaloqatigineqassapput, taamaaliornikkut anguniarlugu maalaarutitut suliaassiissutit siunertamut naapertuuttumik pitsaasumillu suliarineqarnissaasa qulakkeerneqarnissaat.

Siunnersuummut tunuliaqutaavoq Inatsisartut Kultureqarnermut Ilinniartitaanermullu Ataatsimiititaliaata tipsernermit lottornermillu iluanaarutinik agguaassisarneq pillugu Inatsisartut inatsisissaattut siunnersuutaata aappassaaneerneqarnissaannut atatillugu isumaliutissiissutaa, tassani ilaatigut saqqummiunneqarluni ataatsimiititaliamit inassutigineqartoq aalajangiisnaassusilimmik maalaartarfeqarnissap qulakkeerneqarnissaa.